

Las relaziuns tranter il Grischun ed il Vnuost, part 2

Etsch/Adige (Adisch)

Flum en l'Italia dal Nord che nascha en il Vnuost, curra al nord da Bulsau e Verona vers sid e sbucca parallel al Po en la Mar Adriatica, tudestg Etsch, talian Adige. La cuntrada en la part superiura da l'Adisch, il Vnuost, appartegneva en il temp medieval a la regiun culturala curretica-romana. L'uestg da Cuira possedeve terren, subdits e dretgs giudizials tranter Meraun e Danuder. Documents dal 15avel tschientaner menziuneschan «gliued da la Chadé» a l'Adisch. En il temp medieval vegniva flottà da questa regiun tranter auter laina da laresch fin a Vaniescha. La regiun da l'Adisch ha giugà ina rolla impurtanta oravant tut en la Guerra svabaisa (1499) ed è vegnida devastada fermamain, tranter auter era la punt sur l'Adisch a Latsch (istoric Laad). La chanzun «La guardia grischuna» (text: Florian Grand, musica: Robert Cantieni) recorda a quest cumbat dals Grischuns per la libertad: «La not ais s-chüra, müt il god, la claustr'indurmanzada; sur l'Adisch nan tamburs eu od [...]». (red.)

Reschenpass (Pass da Raisch)

Pass a 1504 m en vischinanza dal cunfin svizzer al vest dal Brenner, colliaziun nord-sid da l'Austria en l'Italia, tudestg Reschenpass, talian Passo di Resia. Il Pass da Raisch s'extenda tranter las Alps da l'Oetztal e las muntognas grischunas e collia Raisch (oz sfundrà en in lai da serra) e Danuder. Sparta-auas tranter l'Adisch (Adria) ed il Stillerbach (Mar Naira). En il temp da bronz era il Pass da Raisch ina colliaziun impurtanta tranter la Val da l'Adisch e la Val dal Rain Alpina. L'onn 15 a.C. ha Drusus, figl da l'imperatur roman Augustus, utilisà quest pass per sia campagna en las Alps reticas. L'onn 46 s.C. han ils Romans schlargià la via da pass per entrar cun char e chaval en la provinza Rezia (sin la Via Claudia Augusta ad Augusta Vindelicorum [Augsburg], chapitala da la Raetia secunda). En il segund tschientaner è il Pass da Raisch vegni replazzà tras la ruta pli curta sur il Brenner. En il temp medieval fascheva el part da la Via Sura tras il Tirol che concurrenzava ils pass grischuns. L'antieriura regiun da minieras enturn il pass appartegneva da quel temp a l'uestg da Cuira, pli tard a la Chasa da Habsburg-Austria. Ella furma dapi il 1919 il cunfin tranter l'Austria e l'Italia. Il Pass da Raisch vegn era numnà Fuggerpass, perquai ch'ills Fuggers transportavan lur martganzia da resp. a Vaniescha sur quel pass, guntgind qua tras la duana confederala e grischuna. (Adolf Collenberg)

Pass Crusch

Passadi en il Vnuost che s'extenda al nordvest da Damal vers il Pass da Raisch, tudestg Malser Heide. I sa tracta da la pli gronda sedimentaziun da bo-

va da las Alps (1,5 mia. m³ sin 13 km²). Las culegnas las pli veglias èn vegnidas fundadas als urs protegids da la bova, nua ch'ins ha era costruì las emprimas vias. Il clima extremamain sitg ed il vent permanent dal nord han rendì la cuntrada ordvart criva. Il terren vegn sauà (pli baud cun agid da dutgs, oz cun indrizs moderns) ed utilisà per la pasculaziun e la cultivaziun da seghel. Il toponim rumantsch Crusch sa referescha al tudestg Langkreuz che furma il punct il pli aut dal pass, nua ch'i sa chattava gia il 1258 ina crusch da cunfin (anc oz existenta) tranter las vischnancas en la planira dals lais (dretgira da Danuder) e quellas da Barbusch e da Damal. (red.)

Burgeis/Burgusio (Barbusch)

Fracziun da la vischnanca da Damal, tudestg Burgeis, talian Burgusio. Center dal domini feudal episcopal da Cuira en la regiun da l'Adisch dal temp medieval fin al 17avel tschientaner. Il 1131 ha l'uestg da Cuira, Konrad von Biberegg, consecrà la chaplutta da S. Zeno a Barbusch, il 1146 è la claustra da benedictins vegnida translocada da Scuol a S. Steffen sur Barbusch. Qua è alura vegnida fundada la claustra da Mariamunt (tenor Durich Chiampell, 1573, Chia d'Munt, tudestg Marienberg) ch'ha influenzà fermamain il svilup spiertal e cultural dal Vnuost settentriunal. En il temp autmedieval era la pli part da la populaziun da Barbusch da lingua rumantscha, bieras persunas eran libras (*liberi homines*, 1150). A Barbusch appartegna era la Fürstenburg, residenza d'in chapitani (administratur civil) da l'uestg da Cuira. Barbusch e Mariamunt han survivì relativamain bain la Guerra da la Chalavaina. En il 16avel tschientaner è sa constituìda, sut l'influenza da l'Engiadina e da la Val Müstair, ina minoritad reformada a Barbusch. L'avat Matthias Lang (1615–40) ha promovì la cuntra-reforma ed ha era scumandà da discurre rumantsch, il med il pli efficac per derasar la ductrina nova. L'uschenumnà Program da Barbusch, decretà il 1618 da l'avat Lang, è in exempel classic per l'extirpaziun intenziunada dal rumantsch en favur dal tudestg. Quest program cumpiglia il scumond da predegiar en lingua rumantscha, l'introduziun da la scola populara cun scolasts tudestgs, la proclamaziun dal tudestg sco suletta lingua en las radunanzas communalas e l'obligaziun da tsherner unicamain funcziunaris da lingua tudestga; ils esters, quai vul dir ils Rumantschs, n'obtegnevan nagin domicili senza la permissiun da l'avat; igl era medemamain scumandà d'engaschar personal ester senza l'approvaziun dals superiors. Quest program radical ha provocà l'extirpaziun da la cretta reformada e da la lingua rumantscha a Barbusch. Il 1711 è la germanisaziun a



La claustra da Marienberg.

FOTO: PD

Barbusch vegnida terminada. Cun l'installaziun d'in chapitani austriac il 1618 ha il Grischun pers la dretgira da Chalavaina Sut; Barbusch e ses moviment demografic èn vegnids indeblids. (Martin Bundi)

Marienberg (Mariamunt)

Claustra benedictina en la vischnanca da Damal, situada a 1333 m sin ina spunda al sidvest da Barbusch. 1573 Chia d'Munt (Chiampell), tudestg Marienberg, talian Monte Maria. Successura d'in convent fundà enturn il 1100 a Scuol en l'Engiadina Bassa, translocada il 1146 dad Ulrich III von Tarasp a S. Stefan (ca. 500 m al sid da Mals). Quatter onns pli tard è la communitad monastica sa stabilida en in nov edificiu, costruì al lieu da la claustra actuala. L'avat ed ils muntgs, provegnints per part da la communitad dad Otto beuren en Svevia, èn attestads per l'emprima giada ils 11 da mars 1150. Il 1201 han muntgs da lingua tudestga fundà ina basilica romanica sin ils fundaments da l'emprima baselgia. La giuvna claustra è stada ditg in'insla germanofona en il Vnuost rumantsch. Ella ha promovì durant il temp medieval la colonisaziun e cultivaziun dal terren en la regiun. Mals è vegni sblundregià durant la Guerra dals purs dal 1525 ed ha pati fermamain era sut la reformaziun en il 16avel tschientaner. L'avat Matthias Lang (1615–40) ha laschà restaurar l'edificiu en stil baroc, ha reactivà la cuminanza claustrala, supprimì il moviment reformatoric en il Vnuost e germanisà sistemamain la regiun (Program da Barbusch). Il 1808 ha la Regenza bavaraisa laschà serrar la claustra da Mals ch'è puspè vegnida reactivada il 1816. Tranter il 1724 ed il 1928 han muntgs da Mals instrui al collegi da Meraun; dal 1946–86 ha l'abazia dà albiert ad in gimnasi privat. Las plaivs da Barbusch, da Schlingia e da Platt, incorporadas en la claustra, vegnan pastordas da Mals che fa part dapi il 1931 da la Congregaziun svizra dals benedictins. (Martin Bundi)

Fürstenburg

Il signuradi da Fürstenburg en il Vnuost Superiur ha constituì da la reformaziun fin il 1803, ensem cun la Curt a Cuira, il domini territorial secular da l'uestg da Cuira. Il chastè cun il medem num (rumantsch documentà Chastè dal prinzi, talian Castel del Principe), erigi ca. 1280 da l'uestg Konrad da Cuira a Barbusch, ha furmà fin ca. 1800 in cuntrapol a la Churburg sper Schludern, suenter che quella era vegnida sdrappada als uestgs da Cuira dals chastellans de Matsch. Sin la Fürstenburg residava fin il 1800 in chapitani episcopal che derschava a medem temp sur ils subdits da l'uestg en il Vnuost. Adina puspè èn uestgs fugids

da las Trais Lias sin quest chastè. En il 16avel tschientaner han ils uestgs Beatus a Porta e Peter de Raschèr amplifigà a moda generusa il nuschegl vegl da la Fürstenburg che consistiva d'ina tur grossa, d'in mir da defensiun e d'in chastè intern. Al signur dal Tirol (a partir dal 1363 ils conts de Habsburg) han els stui conceder successivamain dretgs da cumproprietad. Dapi il 1884 è la Fürstenburg, che dat oz alloschi ad ina scola d'agricultura, en possess da la claustra da Mariamunt. (Martin Bundi)

Mals/Malles (Damal)

Vischnanca cun fiera en il Vnuost, situada a 1050 m a la riva da l'Adisch, cun las fracziuns da Barbusch, Laad, Planeil, Matsch, Plawenn, Schlü, Schlingia, Tarsch ed Ulten-Alsack, tudestg Mals, talian Malles (omadius uffizial). 2006 4996 abitants. L'onn 15 a.C. è Damal vegni attribui a la provinza romana Rezia. La vischnanca è vegnida colliada tras vias preistoricas e romanicas cun l'Engiadina e la Val Müstair. Ella è vegnida romanisada mo plaunsieu. Ferma germanisaziun a partir dal temp medieval tardiv. Extincziun dal rumantsch en il 17avel tschientaner. A partir dal temp autmedieval è la vischnanca vegnida suttamesa al domini da l'uestg da Cuira che possedeve en la regiun sis chastels, tschintg grondas migiurias (tranter auter a Damal ed a Barbusch) e grondas bains a Laad e Tarsch. A Damal residavan in derschader episcopal per la Chalavaina Sut (1211–1570) ed il decan dal Vnuost Superiur. A la claustra da Müstair appartegneva la baselgia carolingica da S. Benedetg, erigida en il 9avel tschientaner. A Damal han gi lieu cumbats dals chastellans de Matsch e dals conts dal Tirol cun l'uestg da Cuira. Il 1499, suenter la Battaglia a la Chalavaina, è la vischnanca vegnida devastada dals Grischuns. Il 1618 è ella vegnida annectada ensem cun il Vnuost al contadi dal Tirol. Il 1665 ha l'uestg da Cuira cedi ils dretgs giudizials da la Chalavaina Sut (Damal, Danuder, Schludern) a l'Austria. Damal era pli baud in lieu commercial impurtant per ils Grischuns; oz è la vischnanca in center commercial, turistic, scolastic ed amministrativ dal Vnuost. (Adolf Collenberg)

Matsch

Num d'ina val, d'ina vischnanca, da dus chastels e d'in domini feudal en il Vnuost Superiur.

Val e vischnanca

La Val Matsch (talian Val di Mazia, tudestg Matschertal) è ina val laterala che s'extenda da Schludern en il Vnuost Superiur vers nordost cun il lieu principal da Matsch (talian Mazia), situà a 1576 m. Il flum Saldur ed ils auals laterals Aviuens e Flitter provedan dapi tuts temps (e per part anc oz) in vast sistem

d'ua per sauar las spundas da la part exteriura da la val. Il vitg da Matsch, fracziun da la vischnanca da Damal, ed insaquants da ses aclaus han mantegni lur caracter rumantsch che s'exprima en ils numerus toponims ed en la tipica cultra «retica» (ers terrassads cun mirs da sustegn da fin 10–15 m autezza) sco era en la construcziun arcaica da chasas e da curts purilas enchastradas ina en l'autra. La germanisaziun da Matsch è succedida en il 17avel tschientaner (en consequenza dal Program da Barbusch). Las parts pli veglias da la baselgia parochiala, deditgada a s. Flurin, dateschan dal temp romanic. Tenor la legenda era il s. Flurin naschì a Matsch, ses lieu d'operusad principal era Ramosch.

Chastels

Da la vart sanestra da la Val Matsch, al sid da Chartatscha sur il Schlosshof (1386 m, talian Maso del Castello), sa chattavan ils dus chastels da Matsch Sura e da Matsch Sut ch'èn stads durant ca. dus tschientaners sedias dals signurs de Matsch. Duas lingias, daventadas inimias èn sa ruinadas vicendaivlamain. Dapi ca. l'onn 1297, cura ch'ills de Matsch eran sa patronads da la Churburg episcopal a Schludern, èn ils chastels en la val ids en muschna.

Domini feudal

En il temp autmedieval han ils signurs de Matsch cuntanschì ina posiziun da pussanza unica en il Vnuost Superiur. Els purtavon il titel d'avugà (*advocatus*), suenter che Ulrich de Tarasp, il fundatur da la claustra da Mariamunt, aveva cedi il 1161 ad Eginno von Matsch la protectura sur questa claustra. Ils de Matsch han exercità ultra da quai, cun interrupziuns, era il protecturat sur la claustra da Müstair e sur la gliued da la Chadé en l'Engiadina Bassa, en il Puschlav ed en la regiun da l'Adisch. En il 14avel tschientaner han ils de Matsch possedi temporarmain en pegn ils chastels da Vaduz, da Reichenberg/Müstair, da Tschaniüff/Ramosch, da Greifenstein/Filisur, d'Alt-Süns/Pasqual, da Klingenhorn/Malans ed il 1338 las dretgiras d'Aschera e da Castels en il Partenz. En il 15avel tschientaner han els acquistà la dretgira da Gluorn ed il 1498 la dretgira criminala da l'entir Vnuost. Ma gia il 1363 avevan els stui acceptar formalmain la suveranità dals novs conts dal Tirol (ils Habsburgais), quai che valeva dapi ca. l'onn 1504 era per ils conts von Trapp, lur successurs ereditars. (Martin Bundi)

Churburg

Chastè situà a 999 m al sidost da Schludern en il Vnuost Superiur, erigi tranter il 1253 ed il 1259 tras l'uestg da Cuira, Heinrich III von Montfort (1251–72), sco center dal signuradi per ils subdits da la Chadé en la regiun da l'Adisch. Gia il 1297 è dentant passà il chastè als conts von Matsch. La substanza da l'edificiu dal 13avel tschientaner cumpiglia l'imposanta tur principal da 26 m autezza, il palazi, il mir da rempar e la veglia chaplutta da S. Niclè. Dapi l'entschatta dal 16avel tschientaner fin il di dad oz è la Churburg en possess da la famiglia Trapp che l'ha renovà e transformà en in chastè en stil renaschimental. La Churburg vala sco ina da las atracziuns principalas dal Tirol. (red.)



Al Lai da Raisch.

FOTO: DOROTHEA JACOB/PIXELIO

Lexicon Istoric Retic

Il LIR cumpiglia bundant 3100 artgels (geografics, tematics, artgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.